

四庫全書

史部

欽定四庫全書

史部
史記卷三十三至
五十三

詳校官侍讀學士臣陸伯焜

洗馬臣王坦修覆勘

覆校官中書臣孫希旦

校對官中書臣陳墉

謄錄監生臣朱連傑

欽定四庫全書

史記卷三十三

漢 太 史

令司馬遷 撰

宋中郎外兵曹參軍裴駘集解

唐國子博士弘文館學士司馬貞索隱

唐諸王侍讀率府長史張守節正義

魯周公世家第三

周公旦者周武王弟也

蘇解周曰以太王所居周地為其采邑故謂周公索隱周地

名在岐山之陽本太王所居後以為周公之采邑故曰周公即今之扶風雍東北故周城也諡曰周文公見國語

自文王在時旦為子孝篤仁異於羣子

索隱鄒誕生本孝作敬

及武王即位旦常輔翼武王用事居多武王九年東伐

至盟津周公輔行十一年伐紂至牧野

正義衛州即牧野之地東北去

朝歌七十三里

周公佐武王作牧誓破殷入商宮已殺紂周公

把大鉞召公把小鉞以夾武王釁社告紂之罪於天及

殷民釋箕子之囚封紂子武庚祿父使管叔蔡叔傅之

以續殷祀徧封功臣同姓戚者封周公旦於少昊之虛

曲阜

正義括地志云兗州曲阜縣外城即魯公伯禽所築也

是為魯公周公不就

封留佐武王武王克殷二年天下未集武王有疾不豫

羣臣懼太公召公乃繆卜

集解徐廣曰古書穆字多作繆

周公曰未可

以戚我先王

集解孔安國曰戚近也未可以死近先王也鄭玄曰二公欲就文王廟卜戚憂也未

可憂怖我先王也

周公於是乃自以為質設三壇周公北面立

戴璧秉圭

集解孔安國曰璧以禮神圭以為贄

告于大王王季文王

集解孔安

國曰告謂祝辭

史策祝

集解孔安國曰史為策書祝詞也鄭玄曰策周公所作謂簡書也祝者讀此簡

書以告三王

曰惟爾元孫王發勤勞阻疾

集解徐廣曰阻作淹

若爾三

王是有負子之責於天以旦代王發之身

集解孔安國曰太子之責

謂疾不可救也不可救于天則當以旦代之死生有命不可請代聖人紋臣子之心以垂世教索隱尚書負為

丕今此為負者謂三王負上天之責故我當代之鄭玄曰丕讀曰負

旦巧能多材多執能

事鬼神

集解孔安國曰言可以代武王之意

乃王發不如旦多材多執不

能事鬼神乃命于帝庭敷佑四方

集解馬融曰武王受命于天帝之庭布其

道以佑助四方

用能定汝子孫于下地四方之民罔不敬畏

集解

孔安國曰言武王用受命帝庭之故能定先人子孫於天下四方之民無不敬畏也

無墜天之降

葆命我先王亦永有所依歸

集解孔安國曰言不救則墜天寶命也救之則先王

長有所依歸矣鄭玄曰降下也寶猶主也
有所依歸為宗廟之主也正義墜直類反
今我其即命

於元龜

集解孔安國曰就受三王之命於元龜
卜知吉凶者也馬融曰元龜大龜也

爾之許

我我其以璧與圭歸以俟爾命

集解孔安國曰許謂疾
瘳待命當以事神也馬

融曰待汝命武王
當愈我當死也

爾不許我我乃屏璧與圭

集解孔安
國曰不許

不愈也屏藏
言不得事神

周公已令史策告大王王季文王欲代武

王發於是乃即三王而卜卜人皆曰吉發書視之信吉

集解孔安國
曰占兆書也

周公喜開籥乃見書遇吉

集解王肅曰籥
藏占兆書管也

周公入賀武王曰王其無害旦新受命三王維長終是

圖

集解孔安國曰我新受三王命武王維長終是謀周之道

茲道能念予一人

集解馬融

曰一人天子也鄭玄曰茲此也

周公藏其策金縢匱中

集解孔安國曰藏之於匱緘之

以金不欲人開也

誠守者勿敢言明日武王有瘳其後武王既

崩成王少在強葆之中

索隱強葆即襁褓古字少假借用之正義強關八寸長八尺用

約小兒於背而負行葆小兒被也

周公恐天下聞武王崩而畔周公乃

踐阼代成王攝行政當國管叔及其羣弟流言於國曰

周公將不利於成王

集解孔安國曰放言於國以誣周公以惑成王也

周公乃

告太公望召公奭曰我之所以弗辟

正義音避

而攝行政者

恐天下畔周無以告我先王大王王季文王三王之憂
勞天下久矣於今而后成武王蚤終成王少將以成周
我所以為之若此於是卒相成王而使其子伯禽代就
封於魯周公戒伯禽曰我文王之子武王之弟成王之
叔父我於天下亦不賤矣然我一沐三握髮一飯三吐
哺起以待士猶恐失天下之賢人子之魯慎無以國驕
人管蔡武庚等果率淮夷而反周公乃奉成王命興師
東伐作大誥遂誅管叔殺武庚放蔡叔收殷餘民以封

康叔於衛封微子於宋以奉殷祀寧淮夷東土二年而

畢定諸侯咸服宗周天降祉福唐叔得禾異母同穎集解

徐廣曰一作穗穎即穗也索隱尚書母作畝此為母義並通獻之成王成王命唐叔

以餽周公於東土作餽禾周公既受命禾嘉天子命集解

徐廣曰嘉一作魯今書序作旅也索隱魯字誤史意云周公嘉天子命於文不必作魯作嘉禾東

土以集周公歸報成王乃為詩貽王命之曰鷓鴣集解

毛詩序曰成王未知周公之志公乃為詩以遺王名之曰鷓鴣毛傳曰鷓鴣鷓鴣也王亦未敢訓

周公集解徐廣曰訓一作誥索隱尚書作誥誥讓也此作訓字誤耳義無所通徐氏合定其本何須云一

作誚也 成王七年二月乙未王朝步自周至豐

集解馬融曰周鎬京

也豐文王廟所在朝者舉事上朝將即王中易都大事故告文王武王廟鄭玄曰步行也堂下謂之步豐鎬異邑而言步者告武王廟即行出廟入廟不以為遠為父恭也索隱豐文王所作邑後武王都鎬於豐立文王廟按豐在鄆縣東臨豐水東去鎬二十五里也使太保召公先之維相土

集解鄭玄

曰相視也

其三月周公往營成周維邑

集解駟案公羊傳曰成周者何東周也何

休曰名為成周者周道始成王所都也

卜居焉曰吉遂國之成王長能聽

政於是周公乃還政於成王成王臨朝周公之代成王

治南面倍依以朝諸侯

集解駟案禮記曰周公朝諸侯于明堂之位天子負斧依南向

而立鄭玄曰周公攝王位以明堂之禮儀朝諸侯也不於宗廟避王也天子周公也負之為言倍也斧依為斧文屏風於戶牖之間周公於前立也及七年後還政成王北面就臣位躬

躬如畏然

集解徐廣曰躬躬謹敬貌也見三蒼音窮窮一本作叢叢也

初成王少時

病周公乃自揃其蚤沈之河以祝於神曰王少未有識奸神命者乃旦也亦藏其策於府成王病有瘳及成王

用事人或譖周公周公奔楚

索隱經典無文其事或別有所出而譙周云秦既燔

書時人欲言金滕之事失其本末乃云成王少時病周公禱河欲代王死藏祝策於府成王用事人讒周公周公奔楚成王發府見策乃迎周成王發府見周公禱書公又與蒙恬傳同事或然也

成王發府見周公禱書

乃泣反周公周公歸恐成王壯治有所淫佚乃作多士

作毋逸毋逸稱為人父母為業至長久子孫驕奢忘之

以亡其家為人子可不慎乎故昔在殷王中宗嚴恭敬

畏天命自度

集解孔安國曰用法度也

治民震懼不敢荒寧

集解馬融曰知

民之勞苦不敢荒廢自安也

故中宗饗國七十五年其在高宗

正義武丁

也久勞于外為與小人

集解孔安國曰父小乙使之久居人間勞是稼穡與小人出入

同事也馬融曰武丁為太子時其父小乙使行役有所勞役於外與小人從事知小人艱難勞苦也鄭玄曰為

父小乙將師役於外也

作其即位乃有亮闇三年不言

集解孔安國曰武丁

起其即王位則小乙死乃有信嚙三年不言

言乃謹

集解

鄭玄曰謹喜悅也言乃喜

不敢荒寧密靖殷國

集解馬融曰寧

安至于小大無怨

集解孔安國曰小大之政民無怨者言無非也

故高宗饗國

五十五年

集解駟案尚書云五十九年

其在祖甲

集解孔安國曰王肅曰祖甲湯孫太

甲也馬融曰鄭玄曰祖甲武丁子帝甲也索隱按紀年太甲唯得十二年此云祖甲享國三十三年知祖甲是

帝甲不義惟王久為小人

集解孔安國曰為王不義久為小人之行伊尹放之桐官

馬融曰祖甲有兄祖庚而祖甲賢武丁欲立之祖甲以王廢長立少不義逃亡民間故曰不義惟王久為小人

也武丁死祖庚立祖庚死祖甲立

于外知小人之依能保施小民不侮

鰥寡

集解孔安國曰小人之所依依仁政也故能安順於衆民不敢侮慢悖獨也

故祖甲饗

國三十三年

集解王肅曰先中宗後祖甲先盛德後有過也

多士稱曰自湯至

于帝乙無不率祀明德帝無不配天者

集解孔安國曰無敢失天道者

故無不配天也

在今後嗣王紂誕淫厥佚不顧天及民之從也

集解徐廣曰一作敬之也駟案馬融曰紂大淫樂其逸無所能顧念於天施顯道於民而敬之也

其民

皆可誅周多士文王日中昃不暇食饗國五十年作此

以誠成王成王在豐天下已安周之官政未次序於是

周公作周官官別其宜作立政

集解孔安國曰周公既致政成王恐其怠忽故

以君臣立政為戒也以便百姓百姓說周公在豐病將沒曰必葬

我成周

集解徐廣曰衛世家云管叔欲襲成周然則或說尚書者不以成周為洛陽乎諸侯年表敘曰

齊晉楚秦其在成周微之甚也以明吾不敢離成王周公既卒成王亦

讓葬周公於畢

正義括地志周公墓在雍州咸陽北十三里畢原上

從文王以明

予小子不敢臣周公也周公卒後秋未穫暴風雷雨禾

盡偃大木盡拔周國大恐成王與大夫朝服以開金縢

書

索隱尚書武王崩後有此雷風之異今此言周公卒後更有暴風之變始開金縢之書此不然也蓋由史

遷不見古文尚書故謬爾

王乃得周公所自以為功代武王之說

集解

徐廣曰一作簡駟案孔安國曰所藏請命策書本也二公及王乃問史百執事集解

孔安國曰二公倡王啟之故先見書也史百執事皆從周公請命者鄭玄曰問者問審然否也史百執

事曰信有昔周公命我勿敢言成王執書以泣集解鄭玄曰泣

者傷周公忠孝如是而無知之者曰自今後其無繆卜乎集解孔安國曰本欲敬卜

吉凶今天意可知故止昔周公勤勞王家惟予幼人弗及知今天

動威以彰周公之德惟朕小子其迎我國家禮亦宜之

集解王肅曰亦宜褒有德也正義孔安國云周公以成王未寤故留東未還成王改過自新遣使者迎之亦國家禮有德之宜也王孔二說非也按言成王以開金縢之書知天風雷以彰周公之德故成王亦設郊天之禮

以迎我國家先祖配食之禮亦當
宜之故成王出郊天乃雨反風也
王出郊天乃雨反風

禾盡起

集解孔安國曰郊以玉幣謝天也天即反風起禾明郊之是也馬融曰反風風還反也

二

公命國人凡大木所偃盡起而築之

集解徐廣曰築拾也駟案馬融曰禾

為木所偃者起其木拾其下禾乃無所失亡也歲則大熟於是成王乃命魯得

郊

集解駟案禮記曰魯君祀帝于郊配以后稷天子之禮

祭文王

集解駟案禮記曰諸侯不得祖

天子鄭玄曰魯以周公之故立文王之廟也

魯有天子禮樂者以褒周公之

德也周公卒子伯禽固已前受封是為魯公

索隱周公元子就封

於魯次子留相王室代為周公其餘食小國者六人凡蔣邢茅胙祭也

魯公伯禽之初受

封之魯三年而後報政周公周公曰何遲也伯禽曰變其俗革其禮喪三年然後除之故遲大公亦封於齊五月而報政周公周公曰何疾也曰吾簡其君臣禮從其俗為也及後聞伯禽報政遲乃歎曰嗚呼魯後世其北面事齊矣夫政不簡不易民不有近平易近民民必歸

之

集解徐廣曰一本云政不簡不行不行不樂不樂則不平易平易近民民必歸之又一本云夫民不簡不

易有近乎簡易民必歸之索隱言為政簡易者民必附近之近謂親近也伯禽即位之後有

管蔡等反也淮夷徐戎亦並興反

集解孔安國曰淮浦之夷徐州之戎並起

為 於是伯禽率師伐之於盼作盼誓集解徐廣曰一作

書作柴孔安國曰魯東郊之地名也索隱尚書作柴誓

今尚書大傳作鮮誓鮮誓即盼誓古今字異義亦變也

鮮獮也言於盼地誓衆因行獮田之禮以取鮮獸而

祭故字或作鮮或作獮柴地名即魯卿季氏之費邑曰

陳爾甲冑無敵不善無敵傷牯正義古毒反牯牛馬牢

馬 逸馬牛其風臣妾逋逃集解鄭玄曰風走逸勿敢越逐

敬集解徐廣復之集解孔安國曰勿敢奔越壘伍而求

還 無敵寇攘踰牆垣集解鄭玄曰寇劫取魯人三郊三

隧集解王肅曰邑外曰郊郊外曰隧時爾芻芟糗糧楨

榦集解孔安國曰皆當儲峙汝糧使足食多積芻茭供軍牛馬馬融曰榦榦皆築具榦在前榦在兩傍正義

糗去九反無敵不逮我甲戌築而征徐戎集解孔安國曰甲戌日當

築攻敵壘音真無敵不及有大刑集解馬融曰大刑死刑作此勝誓遂

平徐戎定魯魯公伯禽卒集解徐廣曰皇甫謐云伯禽以成王元年封四十六年康

王十六年卒子考公箇立索隱系本作就鄰本作適考公四年卒立弟熙

是謂煬公索隱熙一作怡煬公築茅集解徐廣曰一作第又作夷闕門集解

世本曰煬公徒魯宋忠曰今魯國六年卒子幽公宰立索隱世本名圍幽公十

四年幽公弟潰殺幽公而自立是為魏公集解徐廣曰世本作微公

欽定四庫全書史記十

索隱系本潰作弗音弗魏作微且古書多用魏字作微則太史公意亦不殊魏公五十年卒

子厲公擢立索隱系本作翟音持角反厲公三十七年卒魯人立其

弟具是為獻公獻公三十二年卒集解徐廣曰劉歆云五十年皇甫謐云三

十六年子真公濞立索隱真音慎本亦作慎公按衛亦有真侯可通也濞系本作摯或作睥音

匹位反鄒誕本作慎公鼻也真公十四年周厲王無道出奔彘共和

行政二十九年周宣王即位三十年真公卒弟敖立是

為武公武公九年春武公與長子括少子戲正義許義反又音許

宜反西朝周宣王宣王愛戲欲立戲為魯太子周之樊

仲山父諫宣王曰廢長立少不順不順必犯王命犯王

命必誅之故出令不可不順也令之不行政之不立

集解

韋昭曰令不行則政不立

行而不順民將弃上

集解韋昭曰使長事少故民將弃上

夫

下事上少事長所以為順今天子建諸侯立其少是教

民逆也

集解唐固曰言不教之順而教之逆

若魯從之諸侯效之王命將

有所壅

集解韋昭曰言先王立長之命將壅塞不行也

若弗從而誅之是自誅

王命也

集解韋昭曰先王之命立長今魯亦立長若誅之是自誅王命也

誅之亦失不

誅亦失

集解韋昭曰誅之誅王命不誅則王命廢

王其圖之宣王弗聽卒立

戲為魯太子夏武公歸而卒

集解徐廣曰劉歆云立二年

戲立是為

懿公懿公九年懿公兄括之子伯御與魯人攻弑懿公

而立伯御為君

正義伯我嫁反

伯御即位十一年周宣王伐魯

殺其君伯御而問魯公子能道順

集解徐廣曰順一作訓正義道音導順音

訓諸侯者以為魯後樊穆仲曰

集解韋昭曰穆仲仲山父之諡也猶魯叔孫穆

子謂之穆叔也

魯懿公弟稱

正義尺證反

肅恭明神敬事耆老賦事

行刑必問於遺訓而咨於固實

集解徐廣曰固一作故韋昭曰故實故事之是

者不干所問不犯所知宣王曰然能訓治其民矣乃立

稱於夷宮

集解韋昭曰夷宮者宣王祖父夷王之廟古者爵命必於祖廟

是為孝公自

是後諸侯多畔王命孝公二十五年諸侯畔周犬戎殺

幽王秦始皇列為諸侯二十七年孝公卒子弗湟立

集解徐廣

曰表云弗生也索隱系本作弗皇年表作孝公子弗生

是為惠公惠公三十年晉

人弑其君昭侯四十五年晉人又弑其君孝侯四十六

年惠公卒長庶子息攝當國行君事是為隱公

索隱隱公名息

系本名息姑

初惠公適夫人無子

正義適音的

公賤妾聲子生子

息息長為娶於宋宋女至而好惠公奪而自妻之

索隱左傳

宋武公生仲子手中有魯夫人文故歸魯生桓公今此云惠公奪息婦而自妻又經傳不言惠公無道左氏文亦分明不知太史公何據生子允集解徐廣曰一作軌而為此說譙周亦深不信索隱一作兀五忽反

登宋女為夫人以允為太子及惠公卒為允少故魯人

共令息攝政不言即位隱公五年觀漁於棠

集解賈逵曰棠魯地

陳漁而觀之杜預曰高平方與縣北有武棠亭魯侯觀漁臺也

八年與鄭易天子之太

山之邑枋及許田君子譏之

集解駟索穀梁傳曰枋者鄭伯之所受命於天子而

祭太山之邑也許田乃魯之朝宿之邑天子在上諸侯不得以地相與

十一年冬公子揮

諂謂隱公曰百姓便君君其遂立吾請為君殺子允君

以我為相

集解駟案左傳曰羽父請殺桓公將以求大宰也

隱公曰有先君命

吾為允少故攝代今允長矣吾方營菟裘之地而老焉

集解服虔曰菟裘魯邑也營菟裘以作宮室欲居之以終老也杜預曰菟裘在泰山梁父縣南以授子

允政揮懼子允聞而反誅之乃反譖隱公於子允曰隱

公欲遂立去子子其圖之請為子殺隱公子允許諾十

一月隱公祭鍾巫

集解賈逵曰鍾巫祭名也

齊于社圃

集解杜預曰社圃圃名

館于為氏

集解服虔曰館舍也為氏魯大夫

揮使人弑隱公于為氏而

立子允為君是為桓公桓公元年鄭以壁易天子之許

田

集解麋信曰鄭以訪不足當許田故復加璧

二年以宋之賂鼎入於太廟

君子譏之

集解駟案穀梁傳曰桓公內殺其君外成人之亂受賂而退以事其祖非禮也公羊傳曰

周公廟曰太廟

三年使揮迎婦于齊為夫人六年夫人生子與

桓公同日故名曰同同長為太子十六年會于曹伐鄭

入厲公十八年春公將有行

集解杜預曰始議行事也

遂與夫人如

齊申繻諫止公

集解賈逵曰申繻魯大夫

公不聽遂如齊齊襄公通

桓公夫人公怒夫人夫人以告齊侯夏四月丙子齊襄

公饗公

集解服虔曰為公設享讌之禮

公醉使公子彭生抱魯桓公因

命彭生摺其脅公死于車魯人告于齊曰寡君畏君之
威不敢寧居來修好禮禮成而不反無所歸咎請得彭
生以除醜於諸侯齊人殺彭生以說魯立太子同是為
莊公莊公母夫人因留齊不敢歸魯莊公五年冬伐衛
內衛惠公八年齊公子糾來奔九年魯欲內子糾於齊
後桓公桓公發兵擊魯魯急殺子糾召忽死齊告魯生
致管仲魯人施伯曰正義世本云施伯魯惠公孫齊欲得管仲非殺
之也將用之用之則為魯患不如殺以其屍與之索隱屍亦

作死 莊公不聽遂囚管仲與齊齊人相管仲十三年魯

莊公與曹沫會齊桓公於柯曹沫劫齊桓公求魯侵地

已盟而釋桓公桓公欲背約管仲諫卒歸魯侵地十五

年齊桓公始霸二十三年莊公如齊觀社集解韋昭曰齊因祀社蒐

軍實以示軍容公往觀之 三十二年初莊公築臺臨黨氏集解賈逵曰黨氏魯

大夫見孟女集解賈逵曰黨氏之女索隱左傳云初公築臺臨黨氏見孟任從之闕杜預曰孟長

任字也 說而愛之許立為夫人割臂以盟集解服虔曰割其臂以與

非姓耳 孟女生子斑斑長說梁氏女集解杜預曰梁氏魯大夫也 往觀園

人犖自牆外與梁氏女戲

集解服虔曰圉人掌養馬者犖其名也正義犖力角反

斑怒鞭犖莊公聞之曰犖有力焉遂殺之是未可鞭而

置也斑未得殺會莊公有疾莊公有三弟長曰慶父次

曰叔牙次曰季友莊公取齊女為夫人曰哀姜哀姜無

子哀姜娣

正義音田庚反

曰叔姜生子開莊公無適嗣愛孟女

欲立其子斑莊公病而問嗣於弟叔牙叔牙曰一繼一

及魯之常也

集解何休曰父死子繼兄死弟及

慶父在可為嗣君何憂

莊公患叔牙欲立慶父退而問季友季友曰請以死立

班也莊公曰曩者叔牙欲立慶父奈何季友以莊公命

命叔牙待於鍼巫氏

集解杜預曰鍼巫氏魯大夫也

使鍼季劫飲叔牙

以鴆

集解服虔曰鴆鳥一曰運日鳥

曰飲此則有後奉祀不然死且無

後牙遂飲鴆而死魯立其子為叔孫氏

集解杜預曰不以罪誅故得立

後世繼其祿也

八月癸亥莊公卒季友竟立子斑為君如莊公

命待喪舍于黨氏

正義未至公宮止於舅氏

先時慶父與哀姜私通

欲立哀姜嫡子開及莊公卒而季友立斑十月己未慶

父使圉人犛殺魯公子斑於黨氏季友犇陳

集解服虔曰季友內

知慶父之情力不能
誅故避其難出奔

慶父竟立莊公子開是為湣公

索隱

系本名曰啟今此作開避漢景帝諱耳春秋作閔公也

湣公二年慶父與哀姜通

益甚哀姜與慶父謀殺湣公而立慶父慶父使卜齋襲

殺湣公於武闈

集解賈逵曰卜齋魯大夫也宮中之門謂之闈正義齋魚綺反闈音韋

季

友聞之自陳與湣公弟申如邾請魯求內之魯人欲誅

慶父慶父恐奔莒於是季友奉子申入立之是為釐公

索隱湣公之弟名曰申成季相之魯國以理於是魯人為僖公作魯頌

釐公亦莊公少子

哀姜恐奔邾季友以賂如莒求慶父慶父歸使人殺慶

父慶父請奔弗聽乃使大夫奚斯行哭而往慶父聞奚斯音乃自殺齊桓公聞哀姜與慶父亂以危魯乃召之邾而殺之以其屍歸戮之魯魯釐公請而葬之季友母陳女故亡在陳陳故佐送季友及子申季友之將生也

父魯桓公使人卜之曰男也其名曰友間于兩社為公

室輔

集解賈逵曰兩社周社亳社也兩社之間朝廷執政之臣所在

季文亡則魯不昌

及生有文在掌曰友遂以名之號為成季其後為季氏慶父後為孟氏也釐公元年以汶陽鄆封季友

集解賈逵曰汶

陽鄭魯二邑杜預曰汶陽汶水北地也汶水出泰山萊蕪縣索隱鄭今作費同音祕按費在汶水之北則汶陽非邑賈言二邑非也地理志東海費縣班固云魯季氏邑蓋尚書費誓即是其地季友為相九

年晉里克殺其君奚齊卓子

集解徐廣曰卓一作悼

齊桓公率釐

公討晉亂至高梁而還

索隱晉地在平陽縣

立晉惠公十七年齊

桓公卒二十四年晉文公即位三十三年釐公卒子興

立是為文公元年楚太子商臣弒其父成王代立

三年文公朝晉襄公十一年十月甲午魯敗翟于鹹集解

服虔曰魯地也

獲長翟喬如富父終甥春其喉以戈殺之

集解服虔

曰富父終甥魯大夫也春猶衛

埋其首於子駒之門

集解賈逵曰子駒魯郭門名以

命宣伯

集解服虔曰宣伯叔孫得臣子喬如也得臣獲喬如以名其子使後世旌識其功

初宋

武公之世鄭瞞伐宋

集解服虔曰武公周平王時在春秋前二十五年鄭瞞長翟國名正

義鄭作瘦音所

劉反瞞莫寒反

司徒皇父帥師禦之以敗翟于長丘

集解

杜預曰

獲長翟緣斯

集解賈逵曰

晉之滅路

集解在魯宣公十五年

年

獲喬如弟楚如齊惠公二年鄭瞞伐齊齊王子城父

獲其弟榮如埋其首於北門

集解駟案年表齊惠公二年魯宣公之二年

衛

人獲其季弟簡

集解服虔曰獲與喬如同時

鄭瞞由是遂亡

集解杜預

曰長翟
之種絕

十五年季文子使於晉十八年二月文公卒文

公有二妃長妃齊女哀姜

索隱此哀非諡蓋以哭而過市國人哀之謂之哀姜

生

子惡及視次妃敬嬴嬖愛生子倭

集解徐廣曰一作倭索隱音人唯反

倭

私事襄仲

集解服虔曰襄仲公子遂

襄仲欲立之叔仲曰不可

集解服虔

曰叔仲
惠伯

襄仲請齊惠公惠公新立欲親魯許之冬十月

襄仲殺子惡及視而立倭是為宣公哀姜歸齊哭而過

市曰天乎襄仲為不道殺適立庶

正義適音的

市人皆哭魯

人謂之哀姜魯由此公室卑三桓彊

集解服虔曰三桓魯桓公之族仲孫

叔孫季孫宣公佞十二年楚莊王彊圍鄭鄭伯降復國之十

八年宣公卒子成公黑肱集解徐廣曰肱一作股立是為成公季

文子曰使我殺適立庶失大援者襄仲集解服虔曰援助也仲殺適立

庶國政無常鄰國非之是失大援助也杜預曰襄仲立宣公南通於楚既不固又不能堅事齊晉故云失大援

襄仲立宣公公孫歸父有寵集解服虔曰歸父襄仲之子宣公欲去

三桓與晉謀伐三桓會宣公卒季文子怨之歸父奔齊

成公二年春齊伐取我隆集解駟案左傳作龍杜預曰魯邑在泰山博縣西南夏

公與晉郤克敗齊頃公於鞏齊復歸我侵地四年成公

如晉晉景公不敬魯魯欲背晉合於楚或諫乃不十年

成公如晉晉景公卒因留成公送葬魯諱之

索隱經不書其葬唯

言公如晉是諱之

十五年始與吳王壽夢會鍾離

正義括地志云鍾離國故

城在濠州鍾離縣東五里

十六年宣伯告晉欲誅季文子

集解服虔曰宣伯叔

孫喬如

文子有義晉人弗許十八年成公卒子午立是為

襄公是時襄公三歲也襄公元年晉立悼公往年冬晉

欒書弒其君厲公四年襄公朝晉五年季文子卒家無

衣帛之妾廐無食粟之馬府無金玉以相三君

索隱宣成襄也

君子曰季文子廉忠矣九年與晉伐鄭晉悼公冠襄公

於衛

集解駟案左傳曰冠于成公之廟假鍾磬焉禮也

季武子從相行禮十一

年三桓氏分為三軍

集解韋昭曰周禮天子六軍諸侯大國三軍魯伯禽之封舊有三軍

其後削弱二軍而已季武子欲專公室故益中軍以為三軍三家各征其一索隱征謂起徒役也武子為三軍故一卿主一軍之征賦十二年朝晉十六年晉平公即位二十一

年朝晉平公二十二年孔丘生

正義生在周靈王二十一年魯襄二十二年晉

平七年吳諸樊十年二十五年齊崔杼弑其君莊公立其弟景公

二十九年吳延陵季子使魯問周樂盡知其意魯人敬

馬三十一年六月襄公卒其九月太子卒

集解駟案左傳曰毀也索

隱左傳云胡女敬歸之子子野立三月卒

魯人立齊歸之子裊為君

集解徐廣曰裊

一作裊服虔曰胡歸姓之國也齊謚也索隱系本作裊徐廣作裊音紹也

是為昭公昭公

年十九猶有童心

集解服虔曰言無成人之志而有童子之心

穆叔不欲立

索隱魯大夫叔孫

曰太子死有母弟可立不即立長

解服虔曰無母弟

年鈞擇賢義鈞則卜之

集解杜預曰先人事後卜筮義

鈞謂賢等今裊非適嗣且又居喪意不在戚而有喜色若果

立必為季氏憂季武子弗聽卒立之比及葬三易衰

集解

杜預曰言其
嬉戲無度

君子曰是不終也昭公三年朝晉至河晉

平公謝還之魯恥焉四年楚靈王會諸侯於申昭公稱

病不往七年季武子卒八年楚靈王就章華臺召昭公

昭公往賀

集解駟案春秋云
七年三月公如楚

賜昭公寶器已而悔復詐

取之

集解駟案左傳曰好以
大屈服虔曰大屈寶金可
以為劍一曰大屈弓名魯
連書曰楚子享魯侯于

章華與之大曲之弓既而悔
之大屈殆所謂大曲之弓也

十二年朝晉至河晉平公

謝還之十三年楚公子棄疾弒其君靈王代立十五年

朝晉晉留之葬晉昭公魯恥之二十年齊景公與晏子

狩竟因入魯問禮

索隱齊系家亦然左傳無其事

二十一年朝晉至河

晉謝還之二十五年春鸚鵒來巢

集解駟案周禮曰鸚鵒不踰濟公羊傳曰

非中國之禽也宜穴而巢穀梁傳曰來者來中國也

師已曰文成之世童謠曰

集解

賈逵曰師已魯大夫也文成魯文公成公

鸚欲來巢公在乾侯鸚鵒入處公

在外野季氏與郈氏

集解徐廣曰一本作厚世本亦然

鬪雞

集解杜預曰季平子

郈昭伯二家相近故鬪雞

季氏芥雞羽

集解服虔曰搗芥子播其雞羽可以全郈氏雞目杜預曰

或云以膠沙播之為芥雞

郈氏金距

集解服虔曰以金鍔距

季平子怒而侵郈

氏

集解服虔曰怒其不下已也侵郈氏之宮地以自益

郈昭伯亦怒平子

索隱系本昭伯

名惡魯孝公之後稱郈氏臧昭伯之弟會偽讒臧氏匿季氏集解賈逵曰昭

伯臧孫賜也索隱系本臧會臧頃伯也宣叔許之孫與昭伯賜為從父昆弟也臧昭伯囚季氏

人季平子怒囚臧氏老集解服虔曰老臧氏家之大臣臧郈氏以難告

昭公昭公九月戊戌伐季氏遂入平子登臺請曰君以

讒不察臣罪誅之請遷沂上弗許集解杜預曰魯城南自有沂水平子欲出

城待罪也大沂水請囚於鄆弗許集解服虔曰鄆季氏邑請以五

乘亡弗許集解服虔曰言五乘自省約以出子家駒曰索隱魯大夫仲孫氏之族名駒

伯諡懿君其許之政自季氏久矣為徒者衆衆將合謀弗

伯

聽郈氏曰必殺之叔孫氏之臣屨

集解駟案左傳曰驥屨

謂其衆

曰無季氏與有執利皆曰無季氏是無叔孫氏屨曰然

救季氏遂敗公師孟懿子

集解賈逵曰懿子仲孫何忌

聞叔孫氏勝

亦殺郈昭伯郈昭伯為公使故孟氏得之三家共伐公

公遂奔己亥公至于齊齊景公曰請致千社待君子家

曰弃周公之業而臣於齊可乎乃止子家曰齊景公無

信不如早之晉弗從叔孫見公還見平子平子頓首初

欲迎昭公孟孫季孫後悔乃止二十六年春齊伐魯取

鄆

集解賈逵曰魯邑

而居昭公焉夏齊景公將內公令無受魯

賂申豐汝賈

集解賈逵曰申豐汝賈魯大夫

許齊臣高齮子將粟五千

庾

集解賈逵曰十六斗為庾五千庾八萬斗索隱一本子將上有貨字子將即梁邱據也齮音紂子將家臣

也左傳子將作子猶

子將言於齊侯曰羣臣不能事魯君有異焉

集解服虔曰異猶恠也

宋元公為魯如晉求內之道卒

集解駟案春秋曰宋

公佐卒于曲棘

叔孫昭子求內其君無病而死

索隱昭子名嫪即穆叔子

不

知天弃魯乎抑魯君有罪于鬼神也願君且待齊景公

從之二十八年昭公如晉求入季平子私於晉六卿六

卿受季氏賂諫晉君晉君乃止居昭公乾侯

集解杜預曰乾侯在

魏郡斥邱縣晉境內邑

二十九年昭公如鄆齊景公使人賜昭公

書自謂主君

集解服虔曰大夫稱主比公於大夫故稱主君

昭公恥之怒而去

乾侯三十一年晉欲內昭公召季平子平子布衣跣行

集解王肅曰示憂戚

因六卿謝罪六卿為言曰晉欲內昭公衆不

從晉人止三十二年昭公卒於乾侯魯人共立昭公弟

宋為君是為定公定公立趙簡子問史墨

集解服虔曰史墨晉史蔡

墨

曰季氏亡乎史墨對曰不亡季友有大功於魯受鄆

為上卿至于文子武子世增其業魯文公卒東門遂

集解

服虔曰東門遂襄仲也居東門故稱東門遂索隱系本並作述鄰誕作林又系本遂產子家歸父及昭子子嬰

也

殺適立庶魯君於是失國政政在季氏於今四君矣

民不知君何以得國是以為君慎器與名不可以假人

集解杜預曰器車服名爵號

定公五年季平子卒陽虎私怒囚季桓

子與盟乃捨之七年齊伐我取鄆以為魯陽虎邑以從

政八年陽虎欲盡殺三桓適而更立其所善庶子以代

之載季桓子將殺之桓子詐而得脫三桓共攻陽虎陽

虎居陽關

集解服虔曰陽關魯邑

九年魯伐陽虎陽虎奔齊已而

奔晉趙氏

正義左傳云仲尼曰趙氏其世有亂乎杜預云受亂人故

十年定公與齊

景公會於夾谷孔子行相事齊欲襲魯君孔子以禮歷

階誅齊淫樂齊侯懼乃止歸魯侵地而謝過十二年使

仲由毀三桓城

集解服虔曰仲由子路

收其甲兵孟氏不肯墮城

集解杜預曰墮毀

伐之不克而止季桓子受齊女樂孔子去

集解

孔安國曰桓子使定公受齊女樂君臣相與觀之廢朝禮三日

十五年定公卒子將立

是為哀公

索隱系本將亦作蔣

哀公五年齊景公卒六年齊田乞

弑其君儒子七年吳王夫差彊伐齊至繒徵百牢於魯
季康子使子貢說吳王及太宰嚭以禮誑之吳王曰我
文身不足責禮乃止八年吳為鄒伐魯至城下盟而去
齊伐我取三邑十年伐齊南邊十二年齊伐魯季氏用
冉有有功思孔子孔子自衛歸魯十四年齊田常弑其
君簡公於徐州孔子請伐之哀公不聽十五年使子服
景伯子貢為介適齊齊歸我侵地田常初相欲親諸侯
十六年孔子卒二十二年越王勾踐滅吳王夫差二十

七年春季康子卒夏哀公患三桓將欲因諸侯以劫之

三桓亦患公作難故君臣多間

集解賈逵曰間隙也

公游于陵阪

集解服虔曰陵阪地名

遇孟武伯於衢

索隱一本作衛非也左傳於孟氏之衢

曰請

問余及死乎

集解杜預曰問已可得壽死不

對曰不知也公欲以越

伐三桓八月哀公如陘氏

集解杜預曰陘氏即有山氏

三桓攻公公

奔於衛去如鄒遂如越國人迎哀公復歸卒于有山氏

集解徐廣曰皇甫謐云哀公元甲辰終庚午

子寧立是為悼公悼公之時三

桓勝魯如小侯畀於三桓之家十三年三晉滅智伯分

其地有之三十七年悼公卒

集解徐廣曰一本云悼公即位三十年乃於秦惠王

卒楚懷王死年合又自悼公以下盡與劉歆曆譜合而反違年表未詳何故皇甫謐云悼公四十年卒未終

戊子嘉立是為元公元公二十一年卒

集解徐廣曰皇甫謐云元辛亥

終辛未子顯立是為穆公

索隱系本顯作不衍

穆公三十三年卒

集解

徐廣曰皇甫謐云元壬申終甲辰

子奮立是為共公共公二十二年卒

集解徐廣曰皇甫謐云元乙巳終丙寅

子屯立是為康公

索隱屯音什倫反

康公

九年卒

集解徐廣曰皇甫謐云元丁卯終乙亥

子匱立是為景公

索隱匱音偃

景公二十九年卒

集解徐廣曰皇甫謐云元丙子終甲辰

子叔立是為平

公索隱系本
叔作旅

是時六國皆稱王平公十二年秦惠王卒

三十二年平公卒

集解徐廣曰皇甫謐云元乙巳終甲子

子賈立是為文

公

索隱系本作潑公鄒誕亦同系家或作文公

文公七年楚懷王死于秦二

十三年文公卒

集解徐廣曰皇甫謐云元乙丑終丁亥

子讎立是為頃公

頃公二年秦拔楚之郢

集解徐廣曰年表云文公十八年秦拔郢楚走陳

楚頃

王東徙于陳十九年楚伐我取徐州

集解徐廣曰徐州在魯東今薛縣索

隱說文邾邾之下邑在魯東又郡國志曰魯國薛縣六國時曰徐州又紀年云梁惠王三十一年下邳遷于薛

故名曰徐州則徐與邾並音舒

二十四年楚考烈王伐滅魯頃公亡遷

於下邑

集解徐廣曰下一作卞索隱下邑謂國外之小邑本或作卞邑然魯有卞邑與此不同

為

家人魯絕祀頃公卒于柯

集解徐廣曰皇甫謐云元戊子終辛亥索隱春秋齊及魯

盟于柯杜預云柯齊邑今濟北東阿

魯起周公至頃公凡三十四世

太史公曰余聞孔子稱曰甚矣魯道之衰也洙泗之間

斷斷如也

集解徐廣曰漢書地理志云魯濱洙泗之間其民涉渡幼者扶老者而代其任俗既薄長

老不自安與幼者相讓故曰斷斷如也斷魚斤反東州語也蓋幼者患苦長者長者愆愧自守故斷斷爭辭所

以為道衰也索隱讀如論語閭閻如也言魯道雖微而洙泗之間尚閭閻如也鄰誕生亦音銀又作斷斷如尚

書讀則斷斷是專一之義徐廣又引地理志音五艱反云斷斷是鬪爭之貌故繁欽遜行賦云涉洙泗而飲馬

則從矣魯尚有揖讓之風如論語音聞為得之
則少長之斷斷是也今按下文云至于揖讓之禮
父及叔牙閔公之際何其亂也隱桓之事襄仲殺適立
庶三家北面為臣親攻昭公昭公以奔至其揖讓之禮
則從矣而行事何其廢也

索隱述贊曰武王既沒成王幼孤周公攝政負康據
圖及還臣列北面匍如元子封魯少昊之墟夾輔王
室世職不渝降及孝公穆仲致譽隱能
讓國春秋之初即明執簡褒貶備書

史記卷三十三

史記卷三十三考證

魯周公世家乃為詩貽王命之曰鷓鴣王亦未敢訓周公○徐字遠曰乃為詩至訓周公十七字宜在上文我所以為之若此句下

初成王少時病周公乃自揃其蚤沈之河以祝於神曰王少未有識奸神命者乃旦也亦藏其策於府成王病有瘳及成王用事人或譖周公周公奔楚成王發府見周公禱書乃泣反周公○困學紀聞曰呂子進

曰考之於書啟金縢之書在周公未薨前而無揃蚤事此蓋一事傳之者不同耳習學記言曰是時楚未有國公奚之焉詩書以為居東而異說以為南奔

周公在豐病將沒○徐孚遠曰周公作洛後成王治鎬京周公治洛尚書甚明曰必葬我成周即其地也無緣在豐

武公九年春武公與長子括少子戲西朝周宣王○年表武公立十年而卒是為周宣王之十二年下文云

夏武公歸而卒是立九年也與表互異

二十七年孝公卒○年表作三十八年宣王誅伯御在伯御之十一年其年乃孝公元年而表以伯御元年為孝公元年故較世家多十一年

慶父竟立莊公子開是為湣公索隱系本名曰啓○左傳疏曰杜世族譜云名啓方

於是季友奉子申入立之是為釐公索隱湣公之弟名曰申○杜預注左傳僖公閔公庶兄成風之子

獲喬如弟焚如○左傳作焚如

襄公元年晉立悼公○左傳及年表晉悼公立於成公十八年二月乙酉非襄公元年

季氏芥雞羽集解服虔曰擣芥子播其雞羽可以至郈氏雞目○左傳疏引此語是賈逵之說非服虔也

齊伐我取三邑○左傳八年夏齊人取讎及闡二邑齊世家亦作取二邑

十五年使子服景伯子貢為介適齊齊歸我侵地○臣

世駿

按齊歸我謹闡在八年春秋經傳無十五年歸侵地之事大約因歸成之語而誤耳

卒于有山氏集解徐廣曰皇甫謐云哀公元年甲辰終庚午○年表甲辰為定公十三年哀公元為丁未左傳疏曰傳稱國人施罪于有山氏不得復歸而卒于其家也

史記卷三十三考證

欽定四庫全書

史記卷三十四

漢 太 史

令司馬遷 撰

宋中郎外兵曹參軍裴駙集解

唐國子博士弘文館學士司馬貞索隱

唐諸王侍讀率府長史張守節正義

燕召公世家第四

召公奭與周同姓姓姬氏

集解譙周曰周之支族食邑於召謂之召公索隱召者畿

內采地奭始食於召故曰召公或說者以為文王受命取岐周故墟召地分爵二公故詩有周召二南言皆在

岐山之陽故言南也後武王封之北燕在今幽州薊縣故城是也亦以元子就封而次子留周室代為召公至

宣王時召穆公虎其後也周武王之滅紂封召公於北燕集解駟案世本曰居

北燕宋忠曰有南燕故云北燕其在成王時召公為三公自陝以西召

公主之自陝以東周公主之集解何休曰陝者蓋今弘農陝縣是也成王

既幼周公攝政當國踐阼召公疑之作君奭集解孔安國曰尊之

曰君陳古以告君奭不說周公集解馬融曰召公以周公既攝政致太平功配

文武不宜復列在臣位故不說以為周公苟貪寵也周公乃稱湯時有伊尹假于

皇天

集解孔安國曰伊摯佐湯功大至天謂致太平也鄭玄曰皇天北極大帝也

在太戊時

則有若伊陟臣扈假于上帝巫咸治王家

集解孔安國曰伊陟臣扈

率伊尹之職使其君不隕祖業故至天之功不隕巫咸治王家言其不及二臣馬融曰道至于上帝謂奉天時

也鄭玄曰上帝太微中其所統也

在祖乙時則有若巫賢

集解孔安國曰時賢臣有

如此巫賢也賢咸子巫氏也

在武丁則有若甘般

集解孔安國曰高宗即位甘般佐之

後有卒維茲有陳保又有殷

集解徐廣曰一無此九字駟案王肅曰循此數臣有

陳列之功安治有殷也

於是召公乃說召公之治西方甚得兆民

和召公巡行鄉邑有棠樹

正義今之棠梨樹也括地志云召伯廟在洛州壽安縣西

北五里召伯聽訟甘棠之下周人思之不伐其樹後人懷其德因立廟有棠在九曲城東阜上

事其下自侯伯至庶人各得其所無失職者召公卒而

民人思召公之政懷棠樹不敢伐歌詠之作甘棠之詩

自召公已下九世至惠侯索隱並國史先失也又自惠侯已下皆無名亦不言屬惟

昭王父子有名蓋在戰國時旁見他說耳燕四十二代有二惠侯二釐侯二宣侯三桓侯二文侯蓋國史微失

本諡故重耳 燕惠侯當周厲王奔彘共和之時惠侯卒子釐

侯立正義釐音僖是歲周宣王初即位釐侯二十一年鄭桓

公初封於鄭三十六年釐侯卒子頃侯立頃侯二十年

周幽王淫亂為犬戎所弑秦始列為諸侯二十四年頃

侯卒子哀侯立哀侯二年卒子鄭侯立

索隱諡法無鄭鄭或是名鄭

侯三十六年卒子繆侯立繆侯七年而魯隱公元年也

十八年卒子宣侯立

索隱譙周云系本謂燕自宣侯已上皆父子相傳故無所疑桓侯已

下並不言屬以其難明故也按今系本無燕代系宋忠依太史公書以補其闕尋徐廣作音尚引系本蓋近代始散宣侯十三年卒子桓侯立

集解徐廣曰古史考曰世家自宣侯已下不說

其屬以其難明故也

桓侯七年卒

集解駟案系本曰桓侯徙臨易宋忠曰今河間易縣是也

子

莊公立莊公十二年齊桓公始霸十六年與宋衛共伐

周惠王惠王出奔溫立惠王弟頹為周王

集解譙周曰按春秋傳燕

與子頹逐周惠王者乃南燕姑姓也系家以為北燕失之索隱譙周云據左氏燕與衛伐周惠王乃是南燕姑姓而系家以為北燕伯故著史考云此燕是姑姓今檢左氏莊十九年衛師伐周二十年齊伐山戎傳云執燕仲父三十年齊伐山戎傳曰謀山戎以其病燕故也據傳文及此記元是北燕不疑杜君妄說仲父是南燕伯為伐周故且燕衛俱是姬姓故有伐周紂王之事故若

十七年鄭執燕仲父而內惠王于周二十七年山戎來侵我齊桓公救燕遂北伐山戎而還燕君送齊桓公出

境桓公因割燕所至地予燕

正義予音與括地志云燕留故城在滄州長蘆縣東

北十七里即齊桓公分溝割燕君
所至地與燕因築此城故名燕留
使燕共貢天子如成

周時職使燕復修召公之法三十三年卒子襄公立襄

公二十六年晉文公為踐土之會稱伯三十一年秦師

敗于殽三十七年秦穆公卒四十年襄公卒桓公立桓

公十六年卒索隱譙周云系家襄伯生宣伯無桓今檢
史記並有桓公立十六年又宋忠據此史

補系家亦有桓公是允南所
見本異則是燕有三桓公也宣公立宣公十五年卒昭

公立昭公十三年卒武公立是歲晉滅三郤大夫武公

十九年卒文公立文公六年卒懿公立懿公元年齊崔

杼弒其君莊公四年卒子惠公立惠公元年齊高止來

奔六年惠公多寵姬公欲去諸大夫而立寵姬宋大夫

共誅姬宋

索隱宋其名也或作宗劉氏云其父兄為執政故諸大夫共滅之

惠公懼奔

齊四年齊高偃如晉請共伐燕入其君晉平公許與齊

伐燕入惠公惠公至燕而死

索隱春秋昭三年北燕伯欸奔齊至六年又云齊伐

北燕一與此文合左傳無納欸之文而云將納簡公晏子曰燕君不入矣齊遂受賂而還事與此乖而又以欸為簡公簡公後惠公四代則與春秋經傳不相協未可強言也

燕立悼公悼公七年卒

共公立共公五年卒平公立晉公室卑六卿始彊大平

公十八年吳王闔閭破楚入郢十九年卒簡公立簡公

十二年卒獻公立

索隱王劭按紀年簡公後次孝公無獻公然紀年之書多是偽謬聊記異

耳

晉趙鞅圍范中行於朝歌獻公十二年齊田常弒其

君簡公十四年孔子卒二十八年獻公卒孝公立孝公

十二年韓魏趙滅智伯分其地

索隱按紀年智伯滅在成公二年也

三晉

彊十五年孝公卒成公立成公十六年卒

索隱按紀年成侯名載

湣公立湣公三十一年卒釐公立

索隱年表作釐侯莊徐廣云一無莊字按

燕失年紀及其君名表言莊者衍字也

是歲三晉列為諸侯

索隱按紀年作文公二十

四年卒簡公立十三年而三釐公三十年伐齊敗于林

晉命邑為諸侯與此不同

營

索隱林營地名一云林地名於林地立營故曰林營

釐公卒

索隱紀年作簡公四十五年卒妾也

按上簡公生獻公則此當是釐但立年又誤耳桓公立桓公十一年卒文公立

索隱系本已上文公為閔公則潞與閔同而上懿公之父又諡文公是歲秦獻公卒秦益

彊文公十九年齊威王卒二十八年蘇秦始來見說文

公文公予車馬金帛以至趙趙肅侯用之因約六國為

從長

正義從足從反長丁丈反

秦惠王以其女為燕太子婦二十九

年文公卒太子立是為易王易王初立齊宣王因燕喪

伐我取十城蘇秦說齊使復歸燕十城十年燕君為王

索隱燕君即易王也言君初以十年即稱王也上言易王者易諡也後追書諡耳

蘇秦與燕文

公夫人私通懼誅乃說王使齊為反間欲以亂齊

集解索

孫子兵法曰反間者因敵間而用之者也凡軍之所欲擊城之所欲攻人之所欲殺必先知其守將左右謁者門者舍人之姓名令吾之間必索敵間之來間我者因而利導舍之故反間可得用也正義使音所史反間音紀寬

易王立十二年卒子燕噲立燕噲既立齊人殺蘇

秦蘇秦之在燕與其相子之為婚而蘇代與子之交及

蘇秦死而齊宣王復用蘇代燕噲三年與楚三晉攻秦

不勝而還子之相燕貴重主斷蘇代為齊使於燕

索隱按戰

國策曰子之使蘇代侍質子於齊齊使代報燕是也

燕王問曰齊王奚如對曰必

不霸燕王曰何也對曰不信其臣蘇代欲以激燕王以

尊子之也於是燕王大信子之子之因遺蘇代百金

正義

瓚云秦以一鑑為一金孟康云二十四兩曰鑑

而聽其所使鹿毛壽

集解徐廣曰一作厝

毛又曰甘陵縣本名厝索隱春秋後語亦作厝毛壽又韓子作潘壽

謂燕王不如以國讓

相子之人之謂堯賢者以其讓天下於許由許由不受

有讓天下之名而實不失天下今王以國讓於子之子

之必不敢受是王與堯同行也燕王因屬國於子之子

之大重

索隱大重謂尊貴也

或曰禹薦益已

索隱以已配益則益已

其文未知所由或曰已語終辭

而以啓人為吏

索隱人猶臣也謂以啓臣為益吏也

及老

而以啓為不足任乎天下傳之於益已而啓與交黨攻益奪之天下謂禹名傳天下於益已而實令啓自取之

今王言屬國於子之而吏無非太子人者

索隱此人亦訓臣也

是

名屬子之而實太子用事也王因收印自三百石吏已

上而效之子之

索隱鄭玄云效呈也以印呈與子之

子之南面行王事而

噲老不聽政顧為臣

索隱顧猶反也言噲反為子之臣也有本作願者非

國事皆

決於子之三年國大亂百姓恫恐

索隱恫猶痛也民皆恐懼

將軍市

被

正義人姓名

與太子平謀將攻子之諸將謂齊湣王曰因

而赴之破燕必矣齊王因令人謂燕太子平曰寡人聞

太子之義將廢私而立公飭君臣之義

正義飭音勅

明父子

之位寡人之國小不足以為先後

正義先後並去聲

雖然則唯

太子所以令之太子因要黨聚眾將軍市被圍公宮攻

子之不克將軍市被及百姓反攻太子平將軍市被死

以徇因搆難數月死者數萬衆人恟恐百姓離志孟軻

謂齊王曰今伐燕此文武之時不可失也

索隱謂如武王成文王之

業伐紂之時然此語與孟子不同

王因令章子將五都之兵

集解駟案章子齊人

見孟子索隱五都即齊也按臨淄是五都之一

以因北地之衆以伐燕

索隱北地即齊

之北邊也

士卒不戰城門不閉燕君噲死齊大勝燕子之亡

集解徐廣曰年表云君噲及太子相子之皆死駟案汲冢紀年曰齊人禽子之而醢其身也

二年而

燕人共立太子平是為燕昭王

集解徐廣曰噲立七年而死其九年燕人共立

太子平索隱按上文太子平謀攻子之而年表又云君噲及太子相子之皆死紀年又云子之殺公子平今此

史云立太子平是為燕昭王則年表紀年為謬也而趙
系家云武靈王聞燕亂召公子職於韓立以為燕王便
樂池送之襄駟亦以此系家無趙送公子職之事當是
遙立職而送之事竟不就則昭王名平非職明矣進退
參詳是年表既誤而

紀年因之而妄說耳

燕昭王於破燕之後即位卑身厚

幣以招賢者謂郭隗曰齊因孤之國亂而襲破燕孤極

知燕小力少不足以報然誠得賢士以共國以雪先王
之恥孤之願也先生視可者得身事之郭隗曰王必欲
致士先從隗始况賢於隗者豈遠千里哉於是昭王為
隗改築宮而師事之樂毅自魏往鄒衍自齊往劇辛自

趙往士爭趨燕燕王弔死問孤與百姓同甘苦二十八年燕國殷富士卒樂軼輕戰於是遂以樂毅為上將軍與秦楚三晉合謀以伐齊齊兵敗湣王出亡於外燕兵獨追北入至臨淄盡取齊寶燒其宮室宗廟齊城之下者獨唯聊莒即墨

索隱按餘篇及戰國策並無聊字

其餘皆屬燕六

歲昭王三十三年卒子惠王立惠王為太子時與樂毅有隙及即位疑毅使騎劫代將樂毅亡走趙齊田單以即墨擊敗燕軍騎劫死燕兵引歸齊悉復得其故城湣

王死于莒乃立其子為襄王惠王七年卒

索隱按趙系家惠文王二

十八年燕相成安君公孫操弒其王樂資以為即惠王也徐廣按年表是年燕武成王元年武成即惠王子則惠王為成安君弒明矣此不言者燕遠諱不告或太史公之說疎也韓魏楚共伐燕燕武

成王立武成王七年齊田單伐我拔中陽十三年秦敗

趙於長平四十餘萬十四年武成王卒子孝王立孝王

元年秦圍邯鄲者解去三年卒子今王喜立

索隱今王猶今上也

有作金者非也按謚法無金

今王喜四年秦昭王卒燕王命相栗腹

約謹趙以五百金為趙王酒還報燕王曰趙王壯者皆

死長平其孤未壯可伐也王召昌國君樂間問之對曰

趙四戰之國

正義趙東隣燕西接秦境南錯韓魏北連胡宿故言四戰

其民習兵不

可伐王曰吾以五而伐一

索隱謂以五人而伐一人

對曰不可燕王

怒羣臣皆以為可卒起二軍車二千乘粟腹將而攻鄒

集解徐廣曰在常山今曰高邑索隱鄒氏音火角反一音昊

卿秦攻代

正義今代州也

唯獨

大夫將渠謂燕王曰

索隱人名姓也一云上卿秦及此將渠皆卿將官秦渠其名也國史

變文而書遂失姓爾戰國策云慶秦慶是姓也卿其官耳

與人通關約交以五百金

飲人之王使者報而反攻之不祥兵無成功燕王不聽

自將偏軍隨之將渠引燕王綬止之曰王必無自往往

無成功王釐之以足將渠泣曰臣非以自為為王也燕

軍至宋子

集解徐廣曰屬鉅鹿

趙使廉頗將擊破粟腹於鄢破卿

秦樂乘於代

索隱戰國策曰廉頗以二十萬遇粟腹於鄢樂乘以五萬遇慶秦於代燕人大敗與

此不

同 樂間奔趙廉頗逐之五百餘里圍其國燕人請和

趙人不許必令將渠處和燕相將渠以處和

集解以將渠為相索

隱謂欲令將渠處之使和也

趙聽將渠解燕圍六年秦滅東西周置

三川郡七年秦拔趙榆次三十七城秦置太原郡九年

秦王政初即位十年趙使廉頗將攻繁陽

集解徐廣曰屬魏郡

拔

之趙孝成王卒悼襄王立使樂乘代廉頗廉頗不聽攻

樂乘樂乘走廉頗奔大梁十二年趙使李牧攻燕拔武

遂

集解徐廣曰屬河間

方城

集解徐廣曰屬涿有督亢亭

劇辛故居趙與龐煖

善

索隱煖音況遠反

已而亡走燕燕見趙數困于秦而廉頗去

令龐煖將也欲因趙弊攻之問劇辛辛曰龐煖易與耳

燕使劇辛將擊趙趙使龐煖擊之取燕軍二萬殺劇辛

秦拔魏二十城置東郡十九年秦拔趙之鄴

正義即相州鄴縣也

九城趙悼襄王卒二十三年太子丹質於秦亡歸燕二

十五年秦虜滅韓王安置潁川郡二十七年秦虜趙王

遷滅趙趙公子嘉自立為代王燕見秦且滅六國秦兵

臨易水

集解徐廣曰出涿郡故安也

禍且至燕太子丹陰養壯士二

十人使荆軻獻督亢地圖於秦

索隱徐廣云涿有督亢亭地理志屬廣陽然督

亢之田在燕東甚良沃欲獻秦故畫其圖而獻焉

因襲刺秦王秦王覺殺軻使

將軍王翦擊燕二十九年秦攻拔我薊燕王亡徙居遼

東斬丹以獻秦三十年秦滅魏三十三年秦拔遼東虜

燕王喜卒滅燕是歲秦將王賁

正義賁音奔王翦子

亦虜代王嘉

太史公曰召公奭可謂仁矣甘棠且思之況其人乎燕

北迫蠻貉內措齊晉

索隱措交雜也又作錯劉氏云爭錯也

崎嶇疆國之

間最為弱小幾滅者數矣然社稷血食者八九百歲於

姬姓獨後亡豈非召公之烈耶

索隱述贊曰召伯作相分陝而治人惠其德甘棠是

思莊送霸王惠羅寵姬文公約趙蘇秦騁辭易王初

立齊宣我欺燕噲無道禪位子之昭王

待士思報臨菑督亢不就卒見芟夷

史記卷三十四

史記卷三十四考證

燕召公世家惠公多寵姬欲去諸大夫而立寵姬宋大夫共誅姬宋○臣照按三姬字俱應作臣世表云公欲殺公卿立幸臣公卿誅幸臣公恐出奔齊然則三姬字並為臣字之訛無疑也公欲立寵姬為妃何必去諸大夫而後得立耶

及蘇秦死而齊宣王復用蘇代○臣照按田完世家及六國年表齊宣王卒後四年燕王噲方立齊人殺蘇

秦及齊破燕並是齊湣王事與孟子異乃此處却謂是齊宣太史公不應首鼠兩端蓋宣為湣字之訛也顧孟子作齊宣而史記作齊湣其故不可得而考矣而噲老不聽政顧為臣○不監本訛作大今改正

齊城之不下者獨唯聊莒即墨索隱按餘篇及戰國策並無聊字○徐字遠曰燕將已下聊城與惠王有郟而不歸則聊字衍文且齊城不拔者向惟二也

悉復得其故城○故監本作敗今依宋本作故

十三年秦敗趙於長平四十餘萬○六國年表及秦本紀秦昭襄之四十七年于趙孝成王為六年是年秦阮趙卒於燕武成王為十二年此云十三年與趙世家合於秦本紀及年表差一年

殺劇辛○臣照按六國年表劇辛死於趙在十三年又按昭王即位劇辛自趙往至此經七十年歷五王當有兩劇辛即否則皆傳訛也

史記卷三十四考證

欽定四庫全書

史記卷三十五

漢 太 史 令司馬遷 撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

管蔡世家第五

管叔鮮正義音仙括地志云鄭州管城縣今州外城即管國城也是叔鮮所封國也 蔡叔度

者周文王子而武王弟也武王同母兄弟十人母曰太

姒

正義國語云祀繒二國姒姓夏禹之後太姒之家太姒文王之妃武王之母列女傳云太姒者武王之母

禹後姒氏之女也在邠之陽在渭之涘仁而明道文王喜之親迎于渭造舟為梁及入太姒思齊旦夕勤勞以盡婦道太姒號曰文母文王理外文母治內太姒生十男教誨自少及長未嘗見邪僻之事言常以正道持之也

文王正妃也其長子曰伯邑考次曰武王發次曰管

叔鮮次曰周公旦次曰蔡叔度次曰曹叔振鐸次曰成

叔武

正義括地志云濮州雷澤縣在東南九十一里漢邠陽縣古邠伯姬姓之國其後遷於成之陽

曰霍叔處

正義處昌汝反括地志云晉州霍邑縣本漢彘縣也鄭玄注周禮云霍山在彘本春秋時

霍伯國地次曰康叔封次曰冉季載正義冉一作冉音奴甘反或作那音同冉國名

也季載人名也伯邑考最長所以加伯諸中子咸言叔以載最少故言季載冉季載最少同

母昆弟十人集解徐廣曰文王之子為侯者十有六國唯發旦賢左右輔文

王正義左右並去聲故文王舍伯邑考而以發為太子及文王

崩而發立是為武王伯邑考既已前卒矣武王已克殷

紂平天下封功臣昆弟於是封叔鮮於管集解杜預曰管在滎陽京

縣東封叔度於蔡集解駟案世本曰居上蔡二人相紂子武庚祿父

治殷遺民封叔旦於魯而相周為周公封叔振鐸於曹

封叔武於成

索隱按春秋隱五年衛師入郟杜預曰東平剛父縣有郟鄉後漢地理志以為成本

國又地理志云廩丘縣南有成故城應劭曰武王封弟季載於成是古之成邑應仲遠誤云季載封耳

封

叔處於霍

索隱春秋閏元年晉滅霍地理志云河東彘縣霍太山在東北是霍叔之所封

康叔

封冉季載皆少未得封

索隱孔安國曰康畿內國名地闕叔字也封叔名耳

武王

既崩成王少周公旦專王室管叔蔡叔疑周公為之不

利於成王乃挾武庚以作亂周公旦承成王命伐誅武

庚殺管叔而放蔡叔遷之與車十乘徒七十人從而分

殷餘民為二其一封微子啓於宋以續殷祀其一封康

叔為衛君是為衛康叔封季載於冉

索隱冉國也載名也季字也冉或作

邠國語曰冉由鄭姬賈逵曰文王子聃季之國也莊十八年楚武王克權遷於那處杜預曰那處楚地南郡編

縣有那口城聃與那皆音奴甘反

冉季康叔皆有馴行

索隱如字音巡馴善也

於

是周公舉康叔為周司寇冉季為周司空

索隱事見左傳定公四年

以佐成王治皆有令名於天下蔡叔度既遷而死其子

曰胡胡乃改行率德馴善周公聞之而舉胡以為魯卿

士索隱尚書云蔡仲克庸祗德周公以為卿士叔卒乃命諸王邦之蔡元無仕魯之文又伯禽居魯乃是七

年致政之後此言乃說居攝政之初未知史遷何憑而有斯言也

魯國治於是周公言

於成王復封胡於蔡以奉蔡叔之祀是為蔡仲

集解宋曰胡徙

居新蔡

餘五叔皆就國無為天子吏者

索隱五叔管叔蔡叔成叔曹叔霍叔

蔡仲卒子蔡伯荒立蔡伯荒卒子宮侯立宮侯卒子厲

侯立厲侯卒子武侯立武侯之時周厲王失國奔彘共

和行政諸侯多叛周武侯卒子夷侯立夷侯十一年周

宣王即位二十八年夷侯卒子釐侯所事立釐侯三十

九年周幽王為犬戎所殺周室卑而東徙秦始得列為

諸侯

正義周幽王為犬戎所殺平王東徙洛邑秦襄公以兵救因送平王至洛故平王封襄公

四十

八年釐侯卒子共侯興立共侯二年卒子戴侯立戴侯

十年卒子宣侯措父立宣侯二十八年魯隱公初立三

十五年宣侯卒子桓侯封人立桓侯三年魯弑其君隱

公二十年桓侯卒弟哀侯獻舞立哀侯十一年初哀侯

娶陳息侯亦娶陳

集解杜預曰息國汝南新息縣

息夫人將歸過蔡蔡

侯不敬息侯怒請楚文王來伐我我求救於蔡蔡必來

楚因擊之可以有功楚文王從之虜蔡哀侯以歸哀侯

留九歲死於楚凡立二十年卒蔡人立其子盼是為繆

侯繆侯以其女弟為齊桓公夫人十八年齊桓公與蔡女戲船中夫人蕩舟桓公止之不止公怒歸蔡女而不

絕也蔡侯怒嫁其弟

索隱弟女弟即蕩舟之姬

齊桓公怒伐蔡蔡潰

遂虜繆侯南至楚邵陵已而諸侯為蔡謝齊齊侯歸蔡

侯二十九年繆侯卒子莊侯甲午立莊侯三年齊桓公

卒十四年晉文公敗楚於城濮二十年楚太子商臣弑

其父成王代立二十五年秦穆公卒三十三年楚莊王

即位三十四年莊侯卒子文侯申立文侯十四年楚莊

王伐陳殺夏徵舒十五年楚圍鄭鄭降楚楚復醜之

正義

釋音

音

二十年文侯卒子景侯同立景侯元年楚莊王卒

二十九年景侯為太子般娶婦於楚而景侯通焉太子

弑景侯而自立是為靈侯靈侯二年楚公子圍弑其王

郟敖而自立為靈王

正義郟紀洽反教五高反

九年陳司徒招弑其

君哀公

索隱招或作茗又作昭並音時遙反

楚使公子棄疾滅陳而有之

十二年楚靈王以靈侯弑其父誘蔡靈侯于申

正義故申城在

鄧州伏甲飲之醉而殺之刑其士卒七十人令公子棄疾

圍蔡十一月滅蔡使棄疾為蔡公

正義蔡之大夫也

楚滅蔡三

歲楚公子棄疾弒其君靈王代立為平王平王乃求蔡

景侯少子廬立之是為平侯

集解宋忠曰平侯徙下蔡索隱今系本無者近脫耳

是年楚亦復立陳楚平王初立欲親諸侯故復立陳蔡

後

集解駟案世本曰平侯者靈侯般之孫太子友之子

平侯九年卒靈侯般之孫

東國攻平侯子而自立是為悼侯悼侯父曰隱太子友

隱太子友者靈侯之太子平侯立而殺隱太子故平侯

卒而隱太子之子東國攻平侯子而代立是為悼侯悼

侯三年卒弟昭侯申立昭侯十年朝楚昭王持美裘二
獻其一於昭王而自衣其一楚相子常欲之不與子常
讒蔡侯留之楚三年蔡侯知之乃獻其裘於子常子常
受之乃言歸蔡侯蔡侯歸而之晉請與晉伐楚十三年

春與衛靈公會邵陵蔡侯私於周長弘以求長於衛

集解

服虔曰載書使蔡在衛上

衛使史鮑言康叔之功德乃長衛夏為晉

滅沈

集解杜預曰汝南平輿縣有郟亭

楚怒攻蔡蔡昭侯使其子為質

於吳以共伐楚

正義質音致

冬與吳王闔閭遂破楚入郢蔡

怨子常子常恐奔鄭十四年吳去而楚昭王復國十六年楚令尹為其民泣以謀蔡蔡昭侯懼二十六年孔子如蔡楚昭王伐蔡蔡恐告急於吳吳為蔡遠約遷以自

近易以相救昭侯私許不與大夫計吳人來救蔡因遷

蔡于州來

索隱州來在淮南下蔡縣

二十八年昭侯將朝于吳大夫

恐其復遷乃令賊利殺昭侯

索隱利賊名也

已而誅賊利以解

過而立昭侯子朔是為成侯

集解徐廣曰或作景

成侯四年宋滅

曹十年齊田常弒其君簡公十三年楚滅陳十九年成

侯卒子聲侯產立聲侯十五年卒子元侯立元侯六年

卒子侯齊立侯齊四年楚惠王滅蔡蔡侯齊亡蔡遂絕

祀後陳滅三十三年

索隱魯哀十七年楚滅陳其楚滅蔡絕其祀又在滅陳之後三十三

年即在春秋後二十三年

伯邑考其後不知所封武王發其後為周

有本紀言管叔鮮作亂誅死無後周公旦其後為魯有

世家言蔡叔度其後為蔡有世家言曹叔振鐸其後為

曹有世家言

索隱曹亦姬姓之國而文之昭春秋之時頗稱疆國傳數十代而後亡豈可附管蔡

亡國之末而沒其篇第自合析為一篇

成叔武其後世無所見霍叔處其

後晉獻公時滅霍康叔封其後為衛有世家言冉季載其後世無所見

太史公曰管叔作亂無足載者然周武王崩成王少天下既疑賴同母之弟成叔冉季之屬十人為輔拂是以諸侯卒宗周故附之世家言

曹叔世家

索隱按上文叔振鐸其後為曹有系家言即曹亦合題系家今附管蔡之末而不出題者

蓋以曹小而少事迹因附管蔡之末不別題篇爾且又管雖無後仍是蔡曹之兄故顯管蔡而畧曹曹叔

振鐸者周武王弟也武王已克殷紂封叔振鐸於曹

集解

宗忠曰濟陰定陶縣

叔振鐸卒子太伯胥立太伯卒子仲君平立

仲君平卒子宮伯侯立宮伯侯卒子孝伯雲立孝伯雲

卒子夷伯喜立夷伯二十三年周厲王奔于燕三十年

卒弟幽伯彊立幽伯九年弟蘇殺幽伯代立是為戴伯

戴伯元年周宣王已立三歲三十年戴伯卒子惠伯兜

立集解孫檢曰兜音徐子反曹惠伯或名雉或名弟或復名弟兜也索隱按年表作惠公伯雉註引孫檢未

詳何代或云齊人亦恐其人不註史記所以王惠伯二險七志阮孝緒七錄並無不知裴駟何所從錄

十五年周幽王為犬戎所殺因東徙益卑諸侯畔之秦

始列為諸侯三十六年惠伯卒子石甫立其弟武殺之

代立是為繆公繆公三年卒子桓公終生立

集解孫檢曰一作終

渥渥音生桓公三十五年魯隱公立四十五年魯弑其君隱

公四十六年宋華父督弑其君殤公及孔父五十五年

桓公卒子莊公夕姑立

索隱夕音亦即射姑也同音亦

莊公二十三年

齊桓公始霸三十一年莊公卒子釐公夷立釐公九年

卒子昭公班立昭公六年齊桓公敗蔡遂至楚召陵九

年昭公卒子共公襄立共公十六年初晉公子重耳其

亡過曹曹君無禮欲觀其駢脅

集解韋昭曰駢者并幹也正義駢白邊反脅許

業

反釐負羈諫不聽

正義釐音僖曹大夫

私善於重耳二十一年晉

文公重耳伐曹虜共公以歸令軍毋入釐負羈之宗族

閻或說晉文公曰昔齊桓公會諸侯復異姓今君囚曹

君滅同姓何以令於諸侯晉乃復歸共公二十五年晉

文公卒三十五年共公卒子文公壽立文公二十三年

卒子宣公彊立

索隱左傳宣公名廬

宣公十七年卒弟成公負芻

立成公三年晉厲公伐曹虜成公以歸已復釋之

索隱案左

傳成十五年晉厲公執負芻歸於京師晉立宣公弟子臧子臧曰聖達節次守節下失節為君非吾節也遂逃奔宋曹人請於晉晉人謂子臧反國吾歸而君子臧反晉於是歸負芻

五年晉欒書中行

偃使程滑弑其君厲公二十三年成公卒子武公勝立

武公二十六年楚公子棄疾弑其君靈王代立二十七

年武公卒子平公頃立平公四年卒子悼公午立是歲

宋衛陳鄭皆火悼公八年宋景公立九年悼公朝於宋

宋囚之曹立其弟野是為聲公悼公死於宋歸葬聲公

五年平公弟通弑聲公代立是為隱公

索隱譙周云春秋無其事今檢

系本及春秋悼伯卒弟露立諡靖公實無聲公隱公蓋是彼文自疎也

隱公四年聲公弟

露弑隱公代立是為靖公靖公四年卒子伯陽立伯陽

三年國人有夢衆君子立於社宮

集解賈逵曰社宮社也鄭衆曰社宮中有

室屋者謀欲亡曹曹叔振鐸止之請待公孫彊許之旦求

之曹無此人夢者戒其子曰我亡爾聞公孫彊為政必

去曹無離曹禍

索隱離即罹被也

及伯陽即位好田弋之事六

年曹野人公孫彊亦好田弋獲白鴈而獻之且言田弋

之說因訪政事伯陽大說之有寵使為司城以聽政夢

者之子乃亡去公孫彊言霸說於曹伯十四年曹伯從

之乃背晉干宋

集解賈逵曰以小加大索隱干謂犯也言曹因棄晉而犯宋遂至滅也裴氏引

賈逵註云以小加大者加陵也小即曹大謂晉及宋也

宋景公伐之晉人不救十

五年宋滅曹執曹伯陽及公孫彊以歸而殺之曹遂絕

其祀

太史公曰

索隱檢諸本或無此論

余尋曹共公之不用僖負羈乃

乘軒者三百人

正義晉世家云晉師入曹數之以其不用僖負羈言而美女乘軒三百人也


知唯德之不建及振鐸之夢豈不欲引曹之祀者哉如

公孫彊不脩厥政叔鐸之祀忽諸

正義至如公孫彊不脩霸道之政而伯陽

之子立叔鐸猶尚饗祭祀豈合忽絕之哉

索隱述贊曰武王之弟管蔡及霍周公居相流言是作狼跋致艱鷓鴣討惡胡能改行克復其爵獻舞執楚過息禮薄穆侯虜齊蕩舟乖詭曹共輕晉負羈先覺伯陽夢社祚傾振鐸



史記卷三十五

史記卷三十五考證

管蔡世家其長子曰伯邑考次曰武王發次曰管叔鮮
次曰周公旦次曰蔡叔度次曰曹叔振鐸次曰成叔
武次曰霍叔處次曰康叔封次曰冉季載○臣照按
十子長次各書不同毛詩疏曰左傳云周公為太宰
康叔為司寇聃季為司空通武王伯邑考為五人又
曰五叔無官則其餘五者皆字叔又曰曹為伯甸非
尚年也則曹叔振鐸是康叔聃季之兄夫管蔡霍為

三監蔡與衛爭長明其皆母弟也郕于富辰之言當
在蔡霍之間五叔者曹管蔡郕霍曹應在管之上皇
甫謚則曰文王娶太妣生伯邑考武王發次管叔鮮
次蔡叔度次郕叔武次霍叔處次周公旦次曹叔振
鐸次康叔封次聃季載其名與史記同其次亦異左
傳疏曰富辰言文之昭十六國蔡在魯上明以長幼
為次賈逵等皆言蔡叔周公兄馬遷之言多辟繆云
今亦莫定孰是姑列其同異如此

餘五叔皆就國索隱五叔管叔蔡叔成叔曹叔霍叔○
左傳杜預注云五叔管叔鮮蔡叔度成叔武霍叔處
毛叔聃也孔穎達疏云史記云聃季載杜云毛叔聃
又不數叔振鐸者杜以振鐸非周公同母故不數之
或杜別有所見不以管蔡世家為說

子宣侯措父立○春秋作考父

悼侯父曰隱太子友隱太子友者靈侯之太子○監本
少隱太子友四字今添

衛使史鮪言康叔之功德○左傳作祝鮀此作史鮪
隱公四十六年宋華父督弑其君殤公及孔父○年表
作四十七年

史記卷三十五考證